

CONVENIO DE COLABORACIÓN ENTRE A CONSELLERÍA DE CULTURA, LINGUA E XUVENTUDE E A FUNDACIÓN GALICIA AMÉRICA POLO QUE SE INSTRUMENTAN AS SUBVENCÍONS NOMINATIVAS PARA ACCÍONS DE FORMACIÓN EN LINGUA E LITERATURA GALEGAS DA FUNDACIÓN GALICIA AMÉRICA E SE REGULA O SEU RÉXIME DE LIBRAMENTOS CON CARGO AOS ORZAMENTOS DE 2025

Santiago de Compostela, 02 de outubro 2025

REÚNENSE:

Don José Carlos López Campos, conselleiro de Cultura, Lingua e Xuventude que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro e pola Lei 12/2007, do 27 de xullo, de acordo co seu nomeamento polo Decreto 44/2024, do 14 de abril, publicado no DOG núm. 73, do 14 de abril de 2024, e polo disposto no Decreto 49/2024, do 22 de abril, polo que se fixa a estrutura orgánica das consellerías da Xunta de Galicia, publicado no DOG núm. 81, do 24 de abril de 2024.

Don _____, co NIF _____, presidente da Delegación arxentina da Fundación Galicia América (vicepresidente do padroado da devandita fundación que actúa no seu nome e representación, de acordo co seu nomeamento que se acordou na reunión do Padroado da Fundación Galicia-América do 22 de xuño de 2020 e de acordo coas atribucións que lle confiren os estatutos desta institución.

Ambas as dúas partes, na representación que teñen e recoñecéndose plena capacidade para obrigarse e convir

EXPOÑEN:

1. Que nos capítulos IV e VII do estado de gastos do orzamento da comunidade autónoma para o ano 2025 figuran dúas subvencións nominativas a favor da Fundación Galicia América por un importe total de corenta e cinco mil euros (45.000,00 €). Trinta mil euros (30.000,00 €) con cargo á partida orzamentaria 13.02.151A.481.02 para contribuír ao financiamento dos gastos de funcionamento e quincemil euros (15.000,00 €) con cargo á partida orzamentaria 13.02.151A.781.1 para os investimentos que ten que afrontar a

entidade para realizar as actividades formativas en lingua e literatura galega que se desenvolven no Colexio Santiago Apóstol en Bos Aires.

2. Que de acordo co artigo 26.1 da Lei 9/2007, do 13 de xuño, de subvencións de Galicia, (en adiante Lei 9/2007) os convenios serán o instrumento habitual para canalizar as subvencións nominativas previstas na Lei anual de orzamentos xerais da Comunidade Autónoma de Galicia e conterán como mínimo os seguintes extremos:

a) A definición do obxecto das subvencións, con indicación do carácter singular delas e as razóns que acreditan o interese público, social, económico ou humanitario e aquelas que xustifican a dificultade da súa convocatoria pública.

b) O réxime xurídico aplicable.

c) Os beneficiarios e as modalidades de axuda.

d) O réxime de xustificación da aplicación dada ás subvencións polos beneficiarios e, se é o caso, polas entidades colaboradoras.

3. Que a Consellería de Cultura, Lingua e Xuventude, a través da Secretaría Xeral da Lingua, é o órgano da Administración xeral da Comunidade Autónoma de Galicia ao cal lle corresponde a promoción e o ensino da lingua galega, así como a dirección, planificación, coordinación e execución da política lingüística da Xunta de Galicia, consonte ao Decreto 146/2024, do 20 de maio, polo que se establece a estrutura orgánica da Consellería.

4. A Consellería de Cultura, Lingua e Xuventude, a través da Secretaría Xeral da Lingua, é o órgano da Administración xeral da Comunidade Autónoma de Galicia ao cal lle corresponde dirixir, planificar, coordinar e executar a política lingüística da Xunta de Galicia, así como programar e desenvolver medidas para o fomento do uso do idioma galego nos diferentes eidos sociais e económicos de Galicia, co fin de incrementar a dispoñibilidade de produtos e servizos en galego.

5. A Secretaría Xeral da Lingua (en diante, SXL) é o órgano encargado de planificar e de desenvolver campañas e medidas de fomento do uso, coñecemento e difusión do galego dentro e fóra do territorio lingüístico galego e, concretamente, atribúenselle as funcións de coordinación e xestión das actividades de formación e promoción da lingua galega, así

como a autorización e homologacións de cursos, seminarios, encontros e congresos de formación de lingua galega e/ou de linguaxes específicas, e a xestión das certificacións de aptitude do alumnado.

6. A Fundación Galicia América (en diante, a Fundación) é unha fundación de interese galego que, tal e como recollen os seus estatutos, ten como obxectivo fundamental o estudo da cultura galega, o estudo científico e a difusión da lingua e, especialmente, a ilustración, defensa e promoción do idioma galego, tarefa que comparte co Goberno de Galicia.

Para o desenvolvemento da súa función, esta Fundación conta cunha delegación na Arxentina que ten entre as súas funcións a de promover e difundir a cultura e a lingua galegas, así como a de organizar as actividades para a consecución destes fins. A través desta delegación, posúe a representación e administración dos bens do Colexio Santiago Apóstol. Este centro está baixo a súa tutela e forma parte do Padroado da Fundación, pois está incluído no seu patrimonio ao cederllo en propiedade o Centro Galicia de Bos Aires, que foi o promotor da creación deste colexio.

7. Que a Consellería de Cultura, Lingua e Xuventude (en diante a Consellería) e a Fundación Galicia América desexan colaborar para fomentar e promover o uso da lingua galega, de acordo co disposto nas seguintes normas:

- a) A Constitución española establece no artigo 3 que “as outras linguas españolas serán tamén oficiais nas respectivas comunidades autónomas de acordo cos seus estatutos”, ademais de recoñecer que as linguas de España son un patrimonio cultural que deberá ser obxecto de respecto e protección.
- b) En consonancia coa Constitución, o Estatuto de autonomía de Galicia no seu artigo 5 dispón que “a lingua propia de Galicia é o galego” e que “os poderes públicos de Galicia garantirán o uso normal e oficial dos dous idiomas e potenciarán o emprego do galego en todos os planos da vida pública, cultural e informativa”.
- c) A Lei 3/1983, de 15 de xuño, de normalización lingüística establece a obriga dos poderes públicos de Galicia de garantir o uso normal do galego e do castelán como linguas oficiais da Comunidade Autónoma galega. Así mesmo, establece que o galego, como

lingua propia de Galicia, é lingua oficial das institucións da comunidade autónoma, da súa Administración, da Administración local e das entidades públicas dependentes da comunidade autónoma.

8. Que de acordo co artigo 19.4.a) e 26.1 da Lei 9/2007, para o outorgamento destas subvencións non é posible promover a concorrência pública, xa que no estado de gastos dos orzamentos para 2025 aparecen dúas dotacións nominativas en favor da Fundación Galicia América.

Por todo o exposto, formalízase o presente convenio que se rexerá polas seguintes:

CLÁUSULAS:

PRIMEIRA. OBXECTO DO CONVENIO

Este convenio ten por obxecto instrumentar o réxime de libramentos das subvencións nominativas que figura nos orzamentos xerais da Comunidade Autónoma de Galicia para o ano 2025 en favor da Fundación Galicia América, conforme ao establecido no estado de gastos da Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025.

O obxecto destas subvencións nominativas á Fundación Galicia América é financiar os gastos correntes e de capital que lle orixine a realización das actividades que leva a cabo o Colexio Santiago Apóstol de Bos Aires, no que se imparten clases de lingua e literatura galegas para as nenas e os nenos que forman parte da ampla colectividade de orixe galega que reside nesa cidade.

De acordo co artigo 26 da Lei de subvencións de Galicia, para o outorgamento destas subvencións non é posible promover a concorrência pública, xa que no estado de gastos dos orzamentos para 2025 aparecen dúas dotacións nominativas a favor da Fundación Galicia América (capítulo IV e capítulo VII).

SEGUNDA. FINALIDADE

A finalidade destas subvencións nominativas á Fundación Galicia América é o financiamento dos gastos de funcionamento e dos investimentos que ten que afrontar a

entidade para a realización de actividades formativas en lingua e literatura galegas que se desenvolven no Colexio Santiago Apóstol de Bos Aires.

TERCEIRA. ACTUACIÓNS PARA DESENVOLVER

A Fundación Galicia América comprométese a destinar as achegas económicas recibidas a través deste convenio a sufragar dos gastos de funcionamento e dos investimentos que se orixinen durante o ano 2025 como consecuencia das seguintes actuacións de formación no Colexio Santiago Apóstolo relacionadas co eido da lingua e cultura galegas.

1. Organización de actividades que difundan o patrimonio material e inmaterial de Galicia a toda persoa nel interesada

Achegamento da historia e xeografía de Galicia ao alumnado do centro educativo e a aquelas outras persoas interesadas, sexan membros da comunidade escolar ou non. Mediante presentacións interactivas, vídeos e charlas de especialistas en presenza ou a distancia co emprego das novas tecnoloxías, fortalecemos / iniciamos o vínculo do público interesado co noso patrimonio cultural.

2. Ensino educativo oficial nos niveis Inicial, Primario e Secundario ao alumnado do Instituto Santiago Apóstolo

O plan de estudos contempla materias curriculares (as que se circunscriben ao currículo do Goberno de Bos Aires), extracurriculares obrigatorias (as que engade o instituto ao currículo oficial) e extracurriculares optativas (engadidas tamén polo centro educativo e que se desenvolven logo do remate das clases citadas anteriormente). Dentro desas extracurriculares obrigatorias atópanse as materias de Lingua, Literatura, Historia e Xeografía de Galicia, que son impartidas cun deseño parello ao dos centros da Galicia administrativa e que contan cunha carga horaria semanal ampla. Son, polo tanto, de curso obrigatorio todas as materias que se atopan dentro do horario académico propio institucionalmente establecido.

Enténdese a defensa e espallamento da lingua e literatura galega na beira oeste do Atlántico dende a participación activa, enunciando proxectos e contribuíndo con achegas construtivas que, en absoluto, teñen por que desmerecer as que se enuncian na Galicia

territorial.

Con relación á subvención para gastos de funcionamento, as actuacións que se van desenvolver serán as seguintes:

- Financiar o pagamento das nóminas e custos de Seguridade Social do persoal docente do Departamento de Lingua e Cultura Galega.

Con relación á subvención para gastos de investimento, as actuacións que se van desenvolver serán as seguintes:

- Adquisición de libros e acceso a plataformas educativas

CUARTA. FINANCIAMENTO E RÉXIME DE COMPATIBILIDADES

A Consellería contribuirá a financiar os gastos correntes e de investimento e outros de capital cun importe total de 45.000,00 €, con cargo aos orzamentos xerais da comunidade autónoma para o ano 2025 coas seguintes contías por aplicación orzamentaria:

- **Aplicación orzamentaria 13.02.151A.481.02: 30.000,00 euros**
- **Aplicación orzamentaria 13.02.151A.781.1: 15.000,00 euros**

Estas axudas serán compatibles coa percepción doutras para as mesmas actividades sempre que, illadamente ou en concorrencia con subvencións ou axudas doutras administracións públicas ou doutros entes públicos ou privados, non superen o 100 % do custo das actividades que vai desenvolver a entidade beneficiaria.

O orzamento desagregado deste convenio recóllese no anexo I.

QUINTA. OBRIGAS DA FUNDACIÓN GALICIA AMÉRICA

A Fundación Galicia América comprométese a:

- Contratar os medios humanos, técnicos e materiais que sexan necesarios para o axeitado desenvolvemento das actividades, de acordo coa lexislación de contratos do sector público, na medida en que resulte de aplicación.

- Executar, no prazo de vixencia deste convenio, as actividades obxecto del.
- Solicitalle á Consellería de Cultura, Lingua e Xuventude os informes e autorizacións preceptivos das actuacións, así como de calquera modificación que xurda no seu desenvolvemento.
- Consentir expresamente a inclusión dos datos relevantes deste convenio nos rexistros públicos que proceda, de acordo co artigo 16 da Lei de subvencións de Galicia.
- Facer constar, nun lugar destacado, o anagrama da imaxe corporativa da Xunta de Galicia como entidade financiadora en todo o material gráfico, divulgativo e publicacións que se fagan relacionados coas actividades obxecto deste convenio.
- Darlles cumprimento ás obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

SEXTA. XUSTIFICACIÓN DOS GASTOS E PAGAMENTO

Considéranse gastos subvencionables os que respondan de xeito indubidable á natureza das actividades que se financien e que se realicen no período de vixencia do convenio. Serán admisibles os gastos orixinados desde o **1 de xaneiro do 2025** ata a data límite de vixencia do convenio.

De conformidade co artigo 29.8 da Lei de subvencións de Galicia, os tributos considéranse un gasto subvencionable cando a persoa beneficiaria da subvención os paga efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación nin os impostos persoais sobre a renda.

De acordo co artigo 29.2 da Lei de subvencións de Galicia, considerarase gasto realizado o que foi efectivamente pagado con anterioridade á finalización do período de vixencia do convenio.

De acordo co artigo 29.3 da Lei de subvencións de Galicia, cando o importe do gasto subvencionable supere as contías establecidas na vixente lexislación de contratos do sector público para o contrato menor, a entidade deberá de solicitar un mínimo de tres ofertas de diferentes provedores con carácter previo á contratación do compromiso para a obra, servizo ou subministración de que se trate, agás que polas súas especiais características non exista mercado suficiente de provedores, o cal deberá de quedar acreditado na documentación xustificativa que se achegue para a percepción da axuda.

Para os sós efectos informativos da entidade beneficiaria, no artigo 118 da Lei 9/2017, do 8 de novembro, de contratos do sector público, segundo a súa tipoloxía, establécense as seguintes contías para o contrato menor:

- Obra: contía inferior a 40.000,00 €, sen incluír o IVE.
- Subministracións ou servizos: contía inferior a 15.000,00 €, sen incluír o IVE.

A xustificación dos gastos de funcionamento e investimento recollidos no convenio efectuarase pola Fundación segundo a modalidade de conta xustificativa, de acordo co previsto no artigo 28 da citada Lei 9/2007, do 13 de xuño, de subvencións de Galicia e no artigo 48 do Regulamento da Lei 9/2007, do 13 de xuño, aprobado polo Decreto 11/2009, do 8 de xaneiro.

De conformidade co establecido no artigo 14.2 da Lei 39/2015, do 1 de outubro, do procedemento administrativo común das administracións públicas e no artigo 10 da Lei 4/2019, do 17 de xullo, de Administración dixital de Galicia, a documentación xustificativa presentarase electronicamente mediante o acceso ao expediente na Carpeta do cidadán da persoa solicitante/representante (<https://sede.xunta.es/carpeta-do-cidadan>).

Mentres non haxa un procedemento específico, esta presentación realizarase a través do procedemento xenérico PR004A - Presentación electrónica de solicitudes, escritos e comunicacións que non contén cun sistema electrónico específico nin cun modelo electrónico normalizado (<https://sede.xunta.gal/detalle-procedemento?codtram=PR004A>). Esta instancia, xunto coa documentación, dirixirase á Consellería de Cultura, Lingua e Xuventude – Secretaría Xeral da Lingua.

Para a presentación da documentación, será necesario o documento nacional de identidade electrónico ou calquera dos certificados electrónicos recoñecidos pola sede electrónica da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

1. Para a percepción da axuda será necesario presentar a seguinte documentación:

- Unha **memoria da actuación**, asinada electronicamente polo órgano competente da entidade, que xustifique o cumprimento das condicións impostas nesta resolución, con indicación das actividades que se realizaron e dos resultados obtidos.
- Unha **memoria económica**, asinada electronicamente polo órgano competente da entidade, xustificativa do custo das actividades realizadas, segundo o modelo do anexo II, que conterá:
 - Unha relación clasificada dos gastos e investimentos.
 - As facturas ou documentos de valor probatorio equivalente no tráfico xurídico mercantil ou con eficacia administrativa e os documentos acreditativos dos gastos de persoal.
 - Os extractos ou certificacións bancarias acreditativos do pagamento das facturas e os documentos acreditativos do gasto de persoal que forman parte da conta xustificativa. No suposto de que o xustificante de pagamento inclúa varias facturas, deberase xuntar unha relación destas. Para gastos de escasa contía, por importes inferiores a 1 000,00 €, a xustificación do pagamento poderá realizarse mediante unha carta de recepción do provedor, no que figure o seu nome ou razón social completo, DNI ou CIF e a data de pagamento.
- Unha **declaración responsable** de que se cumpren todos os requisitos previstos no artigo 10 da Lei 9/2007, do 13 de xuño, de subvencións de Galicia, para obter a condición de beneficiario (anexo III).
- Unha **declaración de axudas percibidas ou solicitadas** para este proxecto, na que se indique a entidade que a concede, a data e o importe total concedido (anexo III).

- Unha **declaración responsable** asinada polo órgano competente de non ter contraídas débedas, por ningún concepto, coa Administración pública da Comunidade Autónoma galega, así como de estar ao día das obrigas tributarias e ao corrente das obrigas sociais, de acordo co artigo 11 da Lei 9/2007, do 13 de xuño, de subvencións de Galicia e co artigo 11 do Decreto 11/2009, do 8 de xaneiro, polo que se aproba o regulamento da citada lei (anexo III)

O órgano xestor está obrigado a comprobar, en último termo, a veracidade desta declaración responsable.

Porén, a Fundación, como beneficiaria da subvención nominativa, poderá autorizar expresamente a SXL, por requirimento desta, para que en calidade de órgano xestor da subvención solicite as certificacións acreditativas de estar ao corrente de pagamento que deben emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia. Para iso, deberá marcar o cadro de verificación da autorización no anexo III, que se empregará como modelo das tres declaracións descritas neste apartado.

As distintas declaracións e memorias deberán estar asinadas electronicamente.

Ao tratarse dunha Fundación de interese galego, élle de aplicación o artigo 38.3 da Lei 12/2006, do 1 de decembro, de fundacións de interese galego, polo que antes do primeiro pagamento a entidade deberá acreditar que as contas anuais lle foron presentadas en prazo ao protectorado.

2. A documentación complementaria presentarse electronicamente, mediante a presentación do documento orixinal se se trata dun documento dixital ou da imaxe electrónica do documento orixinal se se trata dun documento en papel.

Neste último caso, a imaxe electrónica adaptarase ao previsto no Real decreto 4/2010, do 8 de xaneiro, polo que se regula o Esquema nacional de interoperabilidade no ámbito da Administración electrónica, e na Resolución do 19 de xullo de 2011, da Secretaría de Estado para a Función Pública, pola que se aproba a Norma técnica de interoperabilidade de dixitalización de documentos.

As imaxes electrónicas aplicarán os formatos establecidos para os ficheiros de imaxe na Norma técnica de interoperabilidade do catálogo de estándares, a saber: o nivel de resolución mínimo para as imaxes electrónicas será de 200 píxeles por polgada para as imaxes obtidas en branco e negro, cor ou escala de grises; a imaxe electrónica será fiel ao documento orixe, é dicir, respectará a xeometría do documento orixe en tamaños e proporcións, non conterá caracteres ou gráficos que non figurasen no documento de orixe e a súa xeración realizarase por un medio fotoeléctrico.

As imaxes electrónicas que presenten as entidades interesadas ao procedemento administrativo terán eficacia exclusivamente no ámbito da actividade das administracións públicas.

As imaxes electrónicas presentadas garantirán a fidelidade co orixinal baixo a responsabilidade da persoa solicitante ou representante. A Administración poderá requirir a exhibición do documento orixinal para o cotexo da copia electrónica presentada, segundo o disposto na Lei 39/2015, do 1 de outubro, do procedemento administrativo común das administracións públicas. Para estes efectos, a entidade interesada deberá conservar o documento orixinal durante un prazo de 5 anos desde a presentación da imaxe electrónica.

No caso de que algún dos documentos que vaia presentar a persoa solicitante de forma electrónica supere os tamaños límite establecidos pola sede electrónica, permitirase a presentación de forma presencial dentro dos prazos previstos. Para iso, e xunto co documento que se presenta, a persoa interesada deberá mencionar o código e o órgano responsable do procedemento, o número de expediente e o número ou código único de rexistro. Na sede electrónica da Xunta de Galicia, publicarase a relación de formatos, protocolos e tamaño máximo admitido da documentación complementaria para cada procedemento.

Na sede electrónica encóntranse publicados os formatos admitidos para a presentación de documentación. Se a persoa solicitante desexa presentar calquera documentación en formatos non admitidos, poderá realizalo de forma presencial a través de calquera dos rexistros habilitados. A persoa interesada deberá mencionar o código e o órgano responsable do procedemento, o número do expediente e o número ou código único de

registro.

Á vista desta documentación, o órgano competente da Consellería comprobará a realización da actividade e o cumprimento da finalidade do convenio e, unha vez comprobado o cumprimento, expedirá un certificado acreditativo da verificación realizada e tramitará o pagamento á Fundación.

A Consellería reservarase o dereito a solicitar toda a documentación que se considere precisa en relación coa xustificación da realización do obxecto das presentes subvencións.

O prazo máximo para presentar na SXL a xustificación dos investimentos será o **16 de decembro de 2025**.

O pagamento das subvencións realizarase unha vez comprobada a xustificación que se presente e a realización do proxecto para o cal se concedeu. O pagamento realizarase pola parte proporcional da contía da subvención que efectivamente se xustifique.

Cando se advirta un exceso de financiamento da actividade subvencionada con respecto ao custo do proxecto, a Consellería efectuará a dedución polo importe total do exceso, ata o límite da contía que se concedeu.

Poderase realizar un máximo dun pagamento anticipado, previo á xustificación da totalidade dos gastos de financiamento e investimentos previstos no convenio, que suporá a entrega de fondos con carácter previo á xustificación, como financiamento necesario para levar a cabo as actuacións inherentes á subvención, dun máximo dun 80 % da subvención concedida por un importe de 18.000 €, máis un 10 % adicional sobre o importe da subvención que supere os 18.000 € e sen que se exceda a anualidade prevista no exercicio orzamentario, ao abeiro do disposto no artigo 63.1 (subvención corrente) do Regulamento da lei de subvencións de Galicia. Así pois, poderá solicitar un único anticipo de pagamento cun máximo de 19.200 € para cubrir os gastos correntes.

Non se admite anticipado de gasto para a subvención de gastos de capital.

Coa solicitude de anticipo, no momento da sinatura do convenio, a Fundación terá que presentar as certificacións xustificativas de estar ao corrente no cumprimento das obrigas tributarias ou fronte á Seguridade Social e de non ter pendente de pago ningunha

outra débeda coa Administración pública da Comunidade Autónoma. Así mesmo, debe achegarse unha declaración responsable da obtención doutras subvencións, axudas, ingresos ou recursos que financien as actividades subvencionadas.

A falta de xustificación dos gastos e investimentos, incluído do pagamento anticipado, dentro do prazo establecido, determinará a perda do dereito ao cobro total ou parcial da contía recollida no convenio, de acordo co disposto nos artigos 54, 55 e 56 da vixente Lei de subvencións de Galicia.

SÉTIMA. REXISTRO DE CONVENIOS. TRANSPARENCIA E BO GOBERNO

De conformidade co establecido no artigo 30 da Lei 15/2014, do 16 de setembro, de racionalización do sector público e outras medidas de reforma administrativa (BOE núm. 226, do 17 de setembro de 2014), que introduciu diversas modificacións na Lei 38/2003, do 17 de novembro, xeral de subvencións (núm. 276, do 18 de novembro de 2003), esta axuda será publicada na Base de Datos Nacional de Subvencións (BDNS), nos termos recollidos no artigo 20 da Lei 38/2003, do 17 de novembro, xeral de subvencións (BOE núm. 276, do 18 de novembro de 2013), modificado polo artigo 30 da Lei 15/2014, do 16 de setembro, de racionalización do sector público e outras medidas de reforma administrativa (BOE núm. 226, do 17 de setembro de 2014). A BDNS recollerá para a súa publicación e difusión pública información sobre o texto das bases reguladoras destas subvencións, así como a información extractada requirida no apartado 8) do indicado artigo relativo ao obxecto e finalidade destas, os datos da partida orzamentaria á que se imputan as axudas, a identificación das persoas beneficiarias, o importe das outorgadas e efectivamente percibidas e, de ser o caso, as resolucións de reintegros e sancións impostas.

As comunicacións previstas no parágrafo anterior, ao abeiro dos principios recollidos na Lei 19/2013, do 9 de decembro, de transparencia, acceso á información pública e bo goberno (BOE núm. 295, do 10 de decembro de 2013), teñen xustificación porque a BDNS opera como un sistema nacional de publicidade de subvencións e axudas públicas que serve como instrumento de planificación das políticas públicas para promover a transparencia, mellorar a xestión e colaborar na loita contra o fraude.

Así mesmo, a entidade asinante deberá darlles cumprimento ás obrigas de publicidade

que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei 15/2014, do 16 de setembro, de racionalización do sector público e outras medidas de reforma administrativa.

A sinatura deste convenio suporá o consentimento expreso da entidade á Administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, de transparencia, acceso á información pública e bo goberno (BOE núm. 295, 10 de decembro de 2013) e co Decreto 126/2006, do 20 de xullo, polo que se regula o rexistro de convenios da Xunta de Galicia (DOG núm. 149, do 3 de agosto de 2006).

Así mesmo, de acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos (DOG núm. 153, do 9 de agosto de 2006) creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, outorgase consentimento para que se publiquen as axudas concedidas, nos rexistros públicos referidos con expresión da entidade beneficiaria, a contía e a súa finalidade.

OITAVA. DIFUSIÓN DA COLABORACIÓN DAS PARTES

Nas actuacións informativas e divulgativas e publicacións que se fagan relacionadas coas actividades deste convenio farase constar, nun lugar destacado, a colaboración da Consellería de Cultura, Lingua e Xuventude - Secretaría Xeral da Lingua e usaranse para iso, cando proceda, os anagramas aprobados pola normativa de imaxe corporativa da Xunta.

Sexa cal for o medio de difusión, cada unha das partes comprométese a facer mención da outra parte e deste convenio.

NOVENA. VIXENCIA

Este convenio estará vixente dende a data da súa sinatura ata o **30 de decembro de 2025**. Non obstante, este convenio poderá extinguirse por acordo mutuo e voluntario das partes, por desistencia dalgunha ou por denuncia deste por incumprimento dos compromisos adquiridos, o que se comunicará de xeito fidedigno, logo de audiencia da outra parte e con, polo menos, un mes de antelación.

Abranguerá as accións obxecto do convenio que realice a entidade dende o 1 de xaneiro de 2025.

DÉCIMA. COMISIÓN DE SEGUIMIENTO

Coa finalidade de asegurar o cumprimento deste convenio, crearase unha comisión paritaria de seguimento, constituída por dúas persoas representantes da Secretaría Xeral da Lingua, nomeadas pola persoa titular da devandita Secretaría Xeral, e dúas persoas representantes da Fundación Galicia América. Esta comisión, que estará presidida por unha das persoas representantes da Secretaría Xeral da Lingua, coordinará o seu desenvolvemento e estará facultada para resolver cantas dúbidas xurdan na súa execución. Os acordos adoptados neste sentido serán inmediatamente executivos.

DÉCIMO PRIMEIRA. ACEPTACIÓN DA SUBVENCIÓN NOMINATIVA

A persoa representante legal da entidade beneficiaria da subvención nominativa no prazo máximo de dez días dende a sinatura do convenio aceptará inescusablemente por escrito a subvención que se lle concede, así como as condicións impostas para a súa percepción. Transcorrido o referido prazo sen que se produza manifestación expresa entenderase tacitamente aceptada, agás que no mesmo prazo se comunique de xeito formal e expreso a renuncia á subvención concedida.

DÉCIMO SEGUNDA. CAUSAS DE RESOLUCIÓN

Este convenio resolverase:

- Por incumprimento total ou parcial dalgunha das estipulacións que o regulan.
- Polo transcurso do tempo estipulado sen que se culminen as actividades acordadas.
- Pola aplicación dos fondos outorgados no convenio para fins distintos dos que motivaron a súa concesión.

De se resolver o convenio, a Consellería pode, se é o caso, esixir a devolución das cantidades percibidas cos seus correspondentes xuros de mora.

DÉCIMO TERCEIRA. RESPONSABILIDADE DAS ACTUACIÓNS

A sinatura deste convenio non implica relación laboral, contractual ou de calquera outro tipo entre os e as profesionais que vaian desenvolver as actividades previstas e mais a Xunta de Galicia, de tal xeito que a esta non se lle pode esixir ningunha responsabilidade –nin directa, nin indirecta, nin subsidiaria– polos actos ou feitos producidos no desenvolvemento do convenio.

DÉCIMO CUARTA. NOTIFICACIÓNS E COMUNICACIÓNS ELECTRÓNICAS

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas (BOE núm. 236, do 2 de outubro de 2015), os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notific@, <https://notifica.xunta.gal>. Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Todos os trámites administrativos que a Fundación Galicia América deba realizar durante a tramitación deste procedemento realizaranse electronicamente accedendo á Carpeta do cidadán da persoa interesada dispoñible na sede electrónica da Xunta de Galicia.

Mentres non haxa un procedemento transversal específico para convenios, as devanditas comunicacións realizaranse a través do procedemento xenérico PR004A - Presentación electrónica de solicitudes, escritos e comunicacións que non contén cun sistema electrónico específico nin cun modelo electrónico normalizado: <https://sede.xunta.gal/detalle-procedemento?codtram=PR004A>. A devandita comunicación dirixirase á Consellería de

Cultura, Lingua e Xuventude - Secretaría Xeral da Lingua.

DÉCIMO QUINTA. POSIBILIDADE DE DESISTENCIA

De xeito excepcional, o presente convenio de colaboración tramítase e asínase mentres o goberno da comunidade autónoma está en funcións, período durante o que deberá limitar a súa xestión ao despacho de asuntos ordinarios, de acordo co establecido no artigo 50 da Lei 1/2016, do 18 de xaneiro, de transparencia e bo goberno.

Coa sinatura deste convenio o goberno contrae compromisos de gasto que non teñen a consideración de gasto corrente. Co fin de que os ditos compromisos non condicionen as medidas que deba tomar o goberno definitivo que o substitúa, establécese a posibilidade de que a administración actuante, a través do órgano que resulte competente, desista dos seus efectos.

DÉCIMO SEXTA. INFORMACIÓN BÁSICA SOBRE PROTECCIÓN DE DATOS PERSOAIS

As partes asinantes comprométense a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro, de protección de datos persoais e garantía dos dereitos dixitais (BOE núm. 294, do 6 de decembro de 2018), e adoptaranse cantas medidas resulten necesarias para cumprir as súas previsións e, en particular, para garantir a seguridade e integridade dos datos persoais e dos dereitos.

Os datos persoais recadados neste procedemento serán tratados na súa condición de responsable pola Xunta de Galicia – Consellería de Cultura, Lingua e Xuventude coas finalidades de levar a cabo a tramitación administrativa que se derive da xestión deste procedemento e a actualización da información e contidos da Carpeta cidadá.

O tratamento dos datos baséase no cumprimento dunha misión de interese público ou no exercicio dos poderes públicos, conforme á normativa recollida na ficha do procedemento incluída na Guía de procedementos e servizos, no propio formulario anexo e nas

referencias recollidas en <https://www.xunta.gal/informacion-xeral-proteccion-datos>. Con todo, determinados tratamentos poderán fundamentarse no consentimento das persoas interesadas, cuxa esta circunstancia se reflectirá no devandito formulario.

Os datos seranlles comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

Co fin de darlle a publicidade esixida ao procedemento, os datos que identifiquen as persoas interesadas serán publicados conforme ao descrito na presente norma reguladora a través dos distintos medios de comunicación institucionais dos que dispón a Xunta de Galicia como diarios oficiais, páxinas web ou taboleiros de anuncios.

As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e rexistros establecidos na normativa reguladora do procedemento administrativo común, segundo se explícita na información adicional recollida en <https://www.xunta.gal/proteccion-datos-persoais>.

DÉCIMO SÉTIMA. NORMATIVA APLICABLE E XURISDICIÓN

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015, do 1 de outubro, do réxime xurídico do sector público.

O réxime xurídico aplicable a este convenio será o das seguintes normas: Lei 9/2007, do 13 de xuño, de subvencións de Galicia e Decreto 11/2009, do 8 de xaneiro, polo que se aproba o regulamento da citada lei, e Lei de orzamentos xerais da Comunidade Autónoma de Galicia para o ano 2025.

Así mesmo, este convenio tamén estará suxeito aos artigos básicos da Lei 38/2003, do 17 de novembro, xeral de subvencións e do Real decreto 887/2006, polo que se aproba o regulamento da devandita lei.

A xurisdición contencioso-administrativa será a competente para dirimir as cuestións que

puidesen xurdir da aplicación deste convenio.

Ao estaren as dúas partes conformes co pactado, asinan este convenio no lugar e data sinaladas.

O conselleiro de Cultura, Lingua e Xuventude e O presidente da delegación arxentina da
Fundación Galicia América

José Carlos López Campos

Manuel Peleteiro Pérez

Anexo I. Orzamento desagregado das actividades do convenio por accións e liñas de gasto

Liñas de acción/actividades do convenio	
1.ª actividade/acción, descrición: Organización de actividades que difundan o patrimonio material e inmaterial de Galicia a toda persoa nel interesada	
Desagregación das liñas de gasto	Importe
1.ª Profesorado de cultura galega – Gastos do persoal	30.000 euros
Total parcial	30.000 euros
2.ª actividade/acción, descrición: Ensino educativo oficial nos niveis Inicial, Primario e Secundario ao alumnado do Instituto Santiago Apóstolo	
Desagregación das liñas de gasto	Importe
1.ª Adquisición de libros e acceso a plataformas educativas – Grupo Santillana	15.000 euros
Total parcial	15.000 euros
Total	45.000 euros

Anexo II. Memoria económica do custo das actuacións

Don/dona: _____ con DNI/NIF: _____

en nome e representación da entidade _____

con CIF: _____

DECLARA:

Que os gastos que deseguido se relacionan, teñen relación directa coa subvención que lle concedeu a Consellería de Cultura, Lingua e Xuventude para

Acredor	N.º fra.	Data fra.	Importe	Data pagamento
			Suma investimentos	

(Sinatura electrónica)

Anexo III. Declaración responsable

DATOS DO/A DECLARANTE

Nome: _____ Apellidos: _____

NIF: _____ Teléfono: _____

Enderezo electrónico: _____

Entidade á que representa:

CIF: _____ Cargo: _____

DECLARO RESPONSABLEMENTE:

1. Que para as actuacións derivadas do Convenio de colaboración entre a Consellería de Cultura, Lingua e Xuventude e a Fundación Galicia América polo que se instrumentan as subvencións nominativas para formación, a devandita entidade solicitou ou obtivo as axudas que se relacionan a continuación:

AXUDAS CONCEDIDAS:

ORGANISMO	ANO	IMPORTE	DISP. REGULADORA

AXUDAS SOLICITADAS:

ORGANISMO	ANO	IMPORTE	DISP. REGULADORA

Así mesmo, a entidade comprométese a comunicar inmediatamente cantas axudas solicite ou obteña para as mesmas actuacións doutras administracións públicas ou doutros entes públicos ou privados, nacionais ou internacionais, a partir da data desta declaración.

2. Que a entidade á que represento non se atopa incurso en ningunha das prohibicións

para obter a condición de beneficiario recollidas no artigo 10.2 da Lei 9/2007, do 13 de xuño, de subvencións de Galicia.

3. Que a entidade á que represento se atopa ao corrente no cumprimento das obrigas tributarias coa facenda estatal e autonómica impostas polas disposicións vixentes.

4. Que a entidade á que represento se atopa ao corrente no cumprimento das obrigas de Seguridade Social impostas polas disposicións vixentes.

AUTORIZO á Secretaría Xeral da Lingua para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia, para tramitar os pagamentos derivados do Convenio de colaboración entre a Consellería de Cultura, Lingua e Xuventude e a Fundación Galicia América polo que se instrumentan as subvención nominativas para gastos de funcionamento e para investimentos.

(Sinatura electrónica)